


國朝典彙



漢書門		九	函	架	類
		一	四	三	六
		〇	五	四	四

內閣文庫		漢書	九	函	架
			一	四	六
			〇	五	四

內閣文庫		漢	9205
冊數	64	(	40)
函號	294		39

四十



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



國朝典彙卷一百十

都察院右僉都御史臣徐學聚編輯

禮部

章奏

丙午十二月 上謂中書省臣曰古人祝頌其君皆寓警

戒之意適觀羣下所進箋文頌美之辭過多規戒之言

未見殊非古者君臣相戒以誠之道今後箋文只令文

辭平實勿以虛辭為美也

洪武三年四月置磨勘司綜核天下章奏

淺草文庫

九年十二月刑部主事茹太素疏論時務累萬餘言 上  
令人誦之再三採其切要可行者纔五百餘言因嘆曰  
朕所以求言者欲其切於事情而有益於天下國家彼  
浮詞者徒亂聽耳遂令中書行其言之善者且定爲建  
言格式頒示中外使言者陳得失無煩文

十年六月 上謂中書省臣曰清明之朝耳目外通昏暗  
之世聰明內蔽外通則下無壅遏內蔽則上如聾瞶國  
家治否實關於此朕嘗懼下情不能上達得失無由以  
知故廣言路以求直言其有言者朕皆虛心以納之尚  
慮微賤之人敢言而不得言疎遠之士欲言而恐不信

如此則所言有限所聞不廣其令天下臣民凡言事者  
實封直達御前

十一年三月 上謂禮部臣曰周書有言人無於水鑒當  
於民鑒人君深居獨處能明見萬里者良由兼聽廣覽  
以達民情胡元之弊政專中書凡事必先關報然後奏  
聞其君又多昏蔽是致民情不通尋至大亂深爲可戒  
大抵民情幽隱猝難畢達苟忽而不究天下離合之機  
係焉甚可畏也所以古人通耳目於外鑑得失於民有  
見於此矣爾禮部其定奏式申明天下


十四年十二月命翰林編修檢討典籍春坊司直郎賚讀

考駁諸司奏啟以聞

十五年有給事中劾各處巡按試僉事所上章奏有不稱臣及不書日月者請逮問之上曰此亦錯誤其勿問

十七年二月定諸司文移紙式凡奏本紙高一尺三寸一品二品衙門文移紙三等皆高二尺五寸長五尺為一等四尺為一等三尺為一等案驗紙二等皆長二尺五寸高一尺八寸為一等二尺為一等三品至五品衙門文移紙高二尺長二尺案驗紙高一尺八寸長二尺五寸六品七品衙門文移紙高一尺八寸長二尺五寸案驗紙高一尺六寸長二尺八寸九品與未入流衙門文移紙高一尺六寸長二尺案驗紙高一尺四寸長一尺八寸不如式者罪之

永樂二年三月 上召六科都給事中馬麟等諭曰為治貴得大體比爾等疏駁奏牘一字之誤皆喋喋以言瑣碎甚矣吏治文書叢脞積累其精力有時而敝豈免錯謬自今奏內有數日月日等字錯謬者皆令從傍改註用印蓋之不必以聞麟等言奏內有不稱臣者此宜罪之上曰下豈敢慢上或一時急遽漏寫有之必非故違亦令從傍增之因曰爾等在朕左右凡天下何弊當革何利當興何處軍民未安何人奸邪未去當歷歷言



之勿隱若此細故可略也

六年七月命禮部自今諸司庶務啟事東宮處分者則書太子令旨其承受於親王者書王令旨著爲定制

九年三月大營都指揮牛諒坐奏對不實免官責隨寧夏總兵官安遠侯柳升立功自効

洪熙元年四方奏報雨澤章疏舊皆貯通政司司臣有欲送科臣收貯者上曰祖宗所以令天下奏雨澤者蓋欲前知水旱以施恤民之政此良法美意今州縣雨澤章奏乃積於通政司上之人何由知又欲送給事中收貯是欲上之人終不知也如此徒勞州縣何爲自今

四方所奏雨澤至卽進封朕親閱焉

宣德元年正月通政司進各處雨澤奏本上謂侍臣曰祖宗愛民之心保民之道於斯可見前世人主有民之休咎藐不聞者豈是久安長治之道我國家自太祖皇帝令天下有司月奏雨澤世世相承爲成憲歲之豐儉民之休戚靡不周知其慮深矣此奏不知何時遂廢三月御史謝瑤薦賢奏牘誤不書姓自陳改正上謂吏部臣曰古人奏牘皆存敬慎石慶書馬字欠一點懼及死今薦賢不知其姓豈能知其才輕率如此豈稱御史之職遂謫交趾大蠻縣知縣

國朝典彙卷一百一十一  
四年二月吏部奏六科給事中駁出河南浙江等布政司及諸縣并土官等衙門奏本字有洗補錯謬者皆屬不敬其布政使蕭省身等官俱應逮問 上曰此治文書者之罪官則一時倉猝失檢點耳俱勿問

正統十年初宣德以前每有大事與羣臣面議傳旨施行不待批答 上嗣位幼冲面議遂廢至是始命廷臣與內閣會議具本奏決

舊制凡傳奉聖旨諸司奉行者以所得旨意具本覆奏送科惟光祿寺但附錄文簿及柰亨得罪言者謂亨嘗私謁太監王振詐稱奉 英宗皇帝聖旨日給振酒價法

司查無覆本當以詐傳詔旨之罪謂自是每事覆本如諸司景泰間本寺卿齊整言所司事冗中旨處分日每十餘至若逐一覆本不惟文書不勝其繁抑且瑣碎上煩聽覽乞舊附錄爲便從之

天順二年 上謂閣臣李賢曰朕每得章奏無不親閱左右或以爲萬幾至繁一一親覽未免勞神恐非養生之道朕諭之曰身負荷天下之重而圖自安逸可乎勞一身以安兆民予所欲也左右乃不敢復言賢曰自古聖帝明王莫不修德勤政所以天下長治久安彼邪佞輩安知遠慮 陛下不爲所惑足見至明更望持守此心

堅如金石可以馴致太平

上復辟後屬精聖治庶務綜察每覽封疏或有一二字可疑輒取本映日視之曰是磨改者指示左右莫不驚伏成化元年正月 上嘗諭六部臣曰天工人其代之若事當行而緩於覆奏是忽天工也其可乎自今各衙門一應奏題旨意卽明白覆奏發落毋得稽緩五日內不覆奏者該科劾之

三年二月御史趙致言內外風憲官出巡遇機密事情及糾劾奸邪自書奏題本多不熟韻書不免倩人代筆因而泄漏事機請自今重事仍依韻書寫奏常事從便書寫許用題本 上命在外官宜如舊制其京官公差在外宜依韻書若有急切事情恐有泄漏許寫題本務使字畫真楷不許草率

二十二年四月諭御史等官今後通政司鴻臚寺等官宜讀奏辭有差錯一二字者免劾

弘治 年進士潘鐸新除給事中進一疏數日不下忽一日 上退朝入內急宣潘鐸時鐸以疾不在有同官一人代鐸跪進 上面諭曰潘鐸有一疏字樣多錯我卽欲批出令其回話以其新進恐挫其銳耳汝可諭之君父之前何其不慎也鐸聞感懼

國朝典彙卷一百一十一  
章奏  
上勵精政事恐諸司題覆耽延特諭六部都察院凡天下  
奏事有旨令卽看詳以聞者覆奏無過三日事干他司  
須行查者無過十日遇軍機重務及重大事情寬五日  
正德二年正月令兩京都察院御史章奏必先呈堂稟議  
十六年給事中夏言言頃先朝權奸蒙蔽言路不通紊亂  
政本養成禍機如先年劉瑾捏寫旨意旣已伏誅而近  
日錢寧家又復搜出題奏本四十餘件江彬沮抑邊情  
本一百三十六件司禮監隱藏不報本數百件似此欺  
蔽可爲寒心臣以爲本源之地不治則末流可憂乞陛  
下勅令御前紀事給事中二員朝罷赴左順門會同司

禮監官承接章奏紀其數目以防壅蔽 上納之

禮部覆御史謝珊等奏凡臣民奏題章疏務要據實敷陳  
切要簡實不許援引剽竊粉飾虛文若有事理多所關  
涉非一言可盡亦須詳陳以便裁決從之

嘉靖元年正月御史朱衣言君德莫先力行自治莫要改  
過近者羣臣章疏之進陛下御批有云知道了有云已  
有旨夫言知而不言行力行之怠也言有旨而不言是  
非改過之吝也此兩可回護之辭不宜見於聖明之世  
給事中邵錫亦言政令旣出或半載卽更奏請方行或  
期月遂改聖德疊於近習國是滑於羣議卽如邇者內



府薪炭及官軍俸糧二事部臣屢執而不從中官一言而遂決詔書不信中外傳駭新政之初豈宜有此報聞刑科給事中劉世揚言近接出都察院原送司禮監提取內官吳善良揭帖面加浮帖書寫 聖旨吳善良等照前旨免提問司禮監奏請發落臣等竊惟 祖宗之制凡旨意批於題奏本或登聞鼓狀發六科抄行凡重大事傳奉旨意各衙門必補具奏本於蚤朝面進此外未有殊寫旨意出承天門外者所以重勅旨防詐偽也今累批浮帖徑從中出六科不得抄行諸司無從補本輕褻綸音更張舊制此失政之最大也伏望鑒成憲重命令今後旨意悉依 祖宗舊制疏下所司知之

**按**朱字傳帖者奉天門朝罷駕輿司禮巨璫持下丹陛呼該衙門官與之次日蚤朝該衙門官具奏本御前奏云傳奉事理補奏本鴻臚寺官接遞司禮小璫進覽墨字傳帖則出自左順門付該衙門奏行不復面繳若事未穩便須執奏者固不問朱墨也

二年都察院請差御史巡鹽批答稍誤以未下閣臣擬票也給事中黃臣言我朝設立內閣凡百章奏先行票擬今使內閣虛代言之職中貴肆專擅之奸關係匪細漸不可長容臣封還原本以重命令疏入卽加批如制

御史余翱言司禮太監張佐典司章奏不取上裁假借  
綸音疎隔內閣宜亟正此曹蒙蔽之罪以光新政上  
曰章奏朕皆親覽付內閣票擬一遵累朝故事張佐侍  
朕敬慎不欺御史安所得此言下所司知之

三年二月給事中鄧繼曾言祖宗以來凡有批答必下  
內閣擬議而行頃者中旨事不考經文不會理或左  
右羣小竊權希寵以至於此陛下不與大臣共政而  
容若輩干政臣恐大器之不安也疏入上怒下繼曾  
詔獄尋降金壇縣丞時給事中張達韓楷鄭一鵬御史  
林有孚馬明衡季本各論救皆不報

按絲綸簿之復歸內閣

世宗英力妙算所以嚴政本

然不有張璉孰遵承之故內閣票過奉旨事件開載揭  
帖類進與六科旨意題本逐日對同亦自璉始璉以入  
臣操口代天言之重不惟承革宿弊且能有所自處曰  
正德末錢寧江彬家搜出隱匿奏本甚多壅閉之患左  
右屢犯不悛豈自福之道上皆嘉納之


六月命三法司堂上官各督所屬退朝後卽入衙門供事  
章奏應覆者務依欽限有違慢稽遲者具劾以聞從大  
學士張璉奏也

左都御史胡世寧言弘治以前臣僚章奏皆刪繁就簡君

上得以親覽無遺及武宗之時不親政事臣下遂因循自逸不事刪削惟聽吏胥文移或一事而重言或一本而數紙為治之體豈當如是臣願申勅內外諸司凡事當奏題者務照弘治以前舊規刪去繁文務從簡要不許全錄往來文移而部院議覆者亦必撮其要語使無贅詞又無失事庶幾少便省覽上曰覽卿所奏具見忠愛諸司章奏俱朕親覽自今不許煩詞第宜明白開陳要旨庶易省閱都察院曉示內外咸使知之

上諭輔臣曰胡世寧欲大事別具一帖以便親覽一節亦是忠意夫凡奏疏批去之後朕或忘記者無從取閱今宜通行部院等衙門凡事關重大者別用一帖而書御覽略節四字用印一顆後不用印止開堂上官職名本不必用謹具題知字樣只以辭終為結庶朕得細閱之若常事不可為煩卿等再看來

十二年正月副都御史王應鵬等進關精微疏中失書職名先是光祿寺以疏遺職名方被譴褫職應鵬等復犯上怒令下鎮撫司考訊給事中魏良弼請許其自新示以薄罰上謂君臣之際嚴敬為先必自大臣始應鵬等職居風憲首蹈不敬良弼安得輒為論救欺罔朝廷令錦衣衛并逮治之應鵬竟坐是落職閒住良弼奪俸



半年已御史陳邦敷復爲申救謫貴州新添驛丞

二十三年九月掌通政司事工部尚書鄭紳奏廣平上官

黃寧黃球等以無職庶民用印信奏事不知何據吏部

覆議凡職官司印信是之謂護護者視而不用今黃寧

等土舍官男未經襲職雖乃護印候襲豈可據以奏事

請撫按官改正詔可

三十三年正月六科給事中張思靜等以賀疏失題萬壽

字詔錦衣衛逮闕廷各杖四十

十一月禮部儀制司以冬至類進賀表復寫三十二年

上覽之怒詔禮科查叅該司官吏以聞郎中聶靜等伏

罪詔錦衣衛逮靜廷杖之黜爲民員外陳全之主事賈

衝吳仲禮各奪俸半年尚書王用賓等具疏自劾賞之

三十四年閏十一月御史曾佩刷卷南京事竣繳冊有奏

啟二本上責問啟本爲何佩以舊制對上口奏啟

自東宮薨後非一二年淺近失錯此必有說錦衣衛卽

執付鎮撫司嚴訊本情以聞鎮撫司以佩不諳憲典覆

下法司擬罪坐佩違例宜黜爲民上以所擬太輕令

從重別處於是改議謫戍邊衛詔可仍杖而遣之

四十五年革誠意伯劉世延錮勿復用奪中書舍人李鏞

晉府長史俸各一級鏞以賀表晉王親嬖以請封疏俱

有脫誤字世延以軍政自陳乃爲引疾疏疊疊數百言  
自陳功伐語涉怨訕給事中辛自修疏糾之并乞勅禮  
部轉行內外百司自後一應章奏須言簡事核務持大  
體不許仍前瑣屑浮冗如違聽該科叅治 上然之命  
以後章奏俱務簡明切實有如前欺肆者科臣以聞

隆慶二年大學士張居正疏言臣見近日以來朝廷詔旨  
多廢格不行抄到各部槩從停閣或已題奉欽依一切  
視爲故紙禁之不止令之不從至於應勘應報奉旨行  
下者各地方官尤屬違慢有查勘一事而十數年不完  
者文卷委積多致沈埋干証之人半在鬼錄年月旣遠  
事多失真伏望勅下部院等衙門凡大小事務旣奉明  
旨須數日之內卽便題覆若事理了然明白易見者卽  
宜據理剖斷毋但諉之撫按議處以致耽延其有合行  
議勘問奏者亦要酌量事之緩急道之遠近嚴立限期  
趣令奏報該部置立號簿登記註銷如有違限不行奏  
報者從實查叅坐以違制之罪吏部卽以此考其勤惰  
以爲賢否然後人思盡職而事無壅滯也

禮部覆給事中王之垣御史趙焯奏請 上御便殿令九  
卿科道官有大事皆得面奏取自宸斷其疏中語言字  
畫務便省覽得旨今後諸司章奏務詞語簡明字畫楷

大如嘉靖初年式便殿面奏得旨行  
先是南戶部尚書馬森以陞秩具疏謝 上報聞因命禮  
部查官員陞遷并應謝疏當停免者俱酌議遵守部議  
在京文武百官凡遇冊立等大禮合進一表及聖節正  
旦冬至等節止於丹陛前致賀一應陞遷賞賜既經面  
恩或廷謝者俱不得具本稱謝南京并在外五品以上  
衙門及各總兵官凡遇三大節進表慶賀俱照常例行  
或值冊立等大禮例該慶賀者須待本部題允方許換  
表賚進南京五府掌印官六部都察院堂上官大理寺  
正官及各處督撫皆係重臣一應陞遷及經論劾留用

或軍功受賜邊鎮給賞等項既不得廷謝仍許具疏三  
司將佐等官一同受賞者總兵督撫卽與併謝不得另  
疏其疏務明白簡直不得牽合四六之體務爲浮靡之  
辭有不遵守者聽本部及該科叅奏詔如議行

四年戶部覆南戶部尚書劉體乾條陳四事皆瑣屑無甚  
關係得旨今後各衙門瑣屑諸務可徑行者不必一一  
瀆奏

五年都給事中光懋言近來陳乞紛然非徒講讀則敘軍  
功不鳴功伐則辯心迹雖屢經叅寢而來者不止請自  
後陳乞不由撫按者一切寢閣如再三瀆奏及背理違

法者量懲一二以儆其餘

關系甚重古今受名禮月

四平口滄賢南口滄尚書隱蠶綽糾刺四事皆與無甚

編首不數守本滄又結味參表臨收辨於

適其適絲限白簡直不具率合四六之聲發為平韻之

同辨式善守一同受賞法絲具注無相與掛橋不發

廷軍也受恩與與餘賞善取到不發其橋併其其二

國朝典彙卷一百十一

都察院右僉都御史臣徐學聚編輯

禮部九

冠服制宮室輿馬器用附

洪武元年二月學士陶安等奏古者天子五冕祭天地宗

廟社稷諸神各有所用請製之上曰五冕禮太繁今

祭天地宗廟則服袞冕社稷等祭皆用皮弁羣臣陪祭

各服本品梁冠祭服

命省部官會太史合劉基參考歷代朝服公服之制凡大

朝會 天子袞冕御殿則服朝服見 皇太子則服公服仍命制公服朝服以賜百官三月給賜各朝臣袍帶凡二千八百一十三人先是禮部言各官先授散官與見任職事高下不同如御史董希哲前授朝列大夫澧州知府而任七品職事省司郎中宋冕前授亞中大夫黃州知府而任五品職事散官與見任之職不同故其服色不能無異乞定其制乃詔省部臣定議禮部奏唐制服色皆以散官爲準元制散官職事各從其高者故服色亦因之國初服色竝依所授散官蓋與唐制同上曰自今服色宜準所授散官不當計見任之職於是所賜袍帶皆從原授散官給

十一月詔定乘輿以下冠服之制

三年二月命製四方平定巾式頒行天下以士民所服四帶巾未盡善復制此令士人吏民服之阜隸伶人如初所定以異其式

五月禮部言歷代異尚夏尚黑商尚白周尚赤秦尚黑漢尚赤唐服飾尚黃旗幟尚赤今國家承元之後取法周漢唐宋以爲治服色所尚於赤爲宜從之

令士庶妻首飾許用銀鍍金耳環用金珠釧獨用銀服澣色圍衫許用紵絲羅紬絹



命製軍士戰衣表裡異色令各變更服之以新軍號謂之  
駕鴛戰襖

四年正月詔定親祀圓丘方丘宗廟及朝日夕月服袞冕  
祭星辰社稷太歲風雲雷雨嶽瀆山川先農皆用皮弁  
服陪祭官各服本品梁冠祭服

五年三月詔庶民婦女袍衫止以紫綠桃紅及諸淺淡顏  
色其大紅鴉青黃色悉禁勿用帶以藍絹布爲之凡女  
子在室者服飾之制皆作三小髻金釵珠頭髻窄袖褶  
子凡婢使人等縮高頂髻用絹布狹領長襖長裙小婢  
使縮雙髻用長袖短衣長裙

六月定命婦冠服之制

十一月定命婦團衫之制以紅羅爲之繡重雉爲等第一  
品九等二品八等三品七等四品六等五品五等六品  
四等七品三等其餘不用綉雉

六年閏十一月禮臣議品官之見尊長而用朝君公服於  
理未安宜別製梁冠絳衣絳裳革帶大白襪烏烏  
佩綬其衣裳去綠襖三品以上用佩綬三品以下不用  
其祭服三品以上去方心曲領三品以下并去佩綬從  
之仍令如式製祭服賜公侯各一襲以爲祭家廟之用  
十二年正月始令伶人常服綠色巾以別士庶之服

十四年令農民之家許穿紗紬絹布商賈之家止許穿絹布如農民之家但有一人爲商賈者亦不許穿紗紬

十六年七月詔更定冕服之制

二十一年十一月諸王在宮中服飾有擬太子者給事中卓敬乘間白於上曰陛下於諸王不蚤辨等威而使在宮中服飾有與太子等嫡庶相亂尊卑無序何以

令天下耶上咲曰卿言是吾慮未及此耳

二十二年十二月令凡文武官除本等紗帽外遇雨許戴雨帽公差出外許戴帽子入城不許其公差人員出外者亦如之將軍力士校尉旗軍常戴頭巾或襍腦下官

舍人并儒生吏員人民常戴本等頭巾鄉村農夫許戴斗笠蒲笠出人市井不禁不親農業者不許

二十三年三月先是上見朝臣衣多短窄參酌禮制詔禮部尚書李原名司業龔敷叅酌事宜俾存古意原名等議定凡官員衣服寬窄以身爲度文官衣自領至裳去地一寸袖長過手復回至肘袖椿廣一尺袖口九寸公侯駙馬與文職同耆民儒士生員制同文職惟袖過手復回不及肘三寸庶民衣長去地五寸武職官衣去地五寸袖長過手袖椿廣一尺袖口僅七寸衆軍人衣長去地七寸袖過手五寸袖椿廣不過一尺窄不過七

寸袖口僅出拳從之命頒示中外

二十四年十月 上以學校為國儲材而士子巾服無異

吏胥宜甄別之令工部制式以進 上親視必求典雅

凡三易之自命為玉色絹布為之寬袖阜綠阜綠軟巾

垂帶謂之襴衫又聞常親服試之至今藏內府蓋無取

於前朝之式及其以貢舉入監國初不變所服洪武末

許戴遮陽帽遂因私戴之洪熙中 上問着藍衣者何

人左右以監生對 上曰教着青衣好看乃易青圓領

二十六年定文武官朝服梁冠赤羅衣白紗中單俱用青

飾領緣赤羅裳青綠赤羅蔽膝大帶用赤白三色絹章

帶佩綬白襪黑履一品至九品俱以冠上梁數分等第

三月禁官民步卒人等服對襟衣惟騎士許服其不應服

而服者罪之

二十九年七月鹽城縣教諭王孟言公服以朝祭服以祀

今在外凡祀山川諸神流官具祭服未入流者具公服

然公服既於朝賀迎接諸禮用之而又服以祀神禮有

未宜且未入流官公服之制自八品以下皆同其祭服

亦宜與之同 上是其言

三十五年十一月製陪祭服二百襲樂舞生紅羅袍服二

百一十四襲

永樂三年更定袞冕皮弁之製

二十二年十一月戶部主事吳璘奏教坊司樂人靴帽衣服違式等事乞嚴禁止從之

宣德初朝鮮國王言國初賜王九章冕服陪臣一等者比朝臣三等得五梁冠服今世子冠五梁與朝臣等乞爲定制乃命世子冠六梁

正統十二年春上謂工部臣曰官民服式舊有定制今聞有僭用織綉蟒龍飛魚斗牛及違禁花樣者爾工部其通諭之此後敢有仍蹈前非者工匠處斬家口發充邊軍服用之人重罪不宥

景泰四年令錦衣衛指揮侍衛者得衣麒麟服色

天順初禁服大雲柳黃江黃明黃等服京衛指揮等官李春等服大雲柳黃紵絲衣爲錦衣衛所捕獲命各追紵絲二十疋然後罪之

成化二年令官民人等不許僭用服色花樣

十年禁官民人等婦女不許僭用渾金衣服寶石首飾

十二年九鄉以災異陳言內一款軍民服色需用近多僭越服用則僭大紅織金羅段遍地錦騎坐則僭描金鞍鞞減銀鞞轡首飾則僭寶石珠翠今四方金貴絲少率皆坐此宜嚴加禁約違者卽重罪而沒入之

弘治元年國朝品官無蟒衣之制蓋蟒蛇無角無足後內  
官多乞蟒衣大類龍形至是允都御史邊鏞奏始禁之  
十七年八月上謂輔臣劉健等曰在外文職官讀書明  
理猶不敢僭爲內官不知道理尤多僭妄對曰誠如聖  
諭然臣等不知內府該禁花樣上歷數其應用花樣  
甚詳且曰若蟒龍飛魚斗牛皆不許用亦不許私織間  
有賜者或久而損壞亦自織用均爲不可又曰玄黃紫  
皂乃是正禁若柳黃明黃江黃等色亦須禁之又曰玄  
色可禁黑綠乃人間常服不必禁乃內府人不許用耳  
正德元年令軍民婦女不許用銷金衣服帳幔寶石首飾

鐳劍及娼妓不許用金首飾銀鐳劍犯者本身家長夫  
男匠作各治重罪

禁商販吏典僕役娼傷下賤皆不許服用貂裘僧道隸卒  
下賤之人俱不許服用紵絲紗羅綾綿

禁官員人等勿得用玄黃紫民庶之家不許用紗羅紵絲  
嘉靖六年三月上問武弁之制大學士楊一清等對以  
盔頭衣甲之服也一日閱會典又問曰太宗宣宗  
或親征或巡邊其禡祭皆服武弁亦是此武士之服乎  
一清等言按詩洛矣之篇曰韎韐有奭以作六師韎所  
染絳色也韐合韋爲之所謂韠也我朝大明集禮內

武弁凡九講武出征蒐狩大射馮類宜社賞祖罰杜纂  
嚴則服之 皇帝親征祭告天地服武弁之制則韎韁  
也結五彩玉爲飾其詳如此

上諭大學士張璠考定武弁之制增入會典璠對周禮司  
服凡兵事韋弁服卽武弁也因圖弁形并疏其義進覽  
上報曰覽卿註繪武弁圖制足見博考所繪有韎形但  
無繫處想亦有矢冠制古象上尖今皮弁則圓朕惟上  
銳者取其經利當如古製可也又衣裳韎烏皆赤色何  
謂且佩綬俱無而於祭用之可乎璠對自古服冕弁未  
有不用革帶者革帶前繫韋弁之韎止繫於

革帶耳武事尚威故色多用赤詩韎韐有奭乃天子講  
武之章奭赤貌韎烏從裳色故皆赤佩綬於禮制不可  
缺但未有明據采芑詩曰服其命服朱芾斯皇有蒼葱  
玼此詩爲方叔南征而作其戎衣尚備佩玉如此則天  
子武弁從亦可推惟聖明裁定乃命造武弁冠服衣裳  
韎烏俱如古制增革帶佩綬及圭仍諭禮部擇吉行

七年 上以燕居冠服多俗制不雅諭輔臣張璠考古帝  
王燕居法服之制璠乃采輯禮書玄端深衣之文圖註  
以進 上爲參定其制示璠且諭之曰古道尚儉今道  
尚華且古玄端之服通於上下茲故爲等威之制以酌

古今別上下卿其詳加訂議成朕志焉璉對曰古服除冕服外玄端深衣二者其用最廣皇上於玄端但加之文飾不易舊制於深衣但易以黃色不雜衣誠得帝王損益時中之道及照品官冠服固有制度其餘燕居之服乞更如古玄端別爲簡易之制以昭布天下使貴賤有等 上從之

上製忠靜冠服併以圖冊頒示禮部諭之曰比來衣服詭異雖達官顯士未免淪俗與市井同走卒役廝乃敢濫服與儒流並上下無所辨民志何由定乎禮曰衣服在躬不知其名曰罔又曰不學雜服不能安禮故欲警於

有位自難混於無名因復酌古玄端之制更名曰忠靜庶幾進斯盡忠退斯補過也朕已著爲圖說告之 祖考示不敢專頒之天下傳之後世示不可私許在京七品以上翰林國學行人官八品以下者在外方面官府州縣正官學校官武職都督以上官服之令禮部頒圖式於天下如勅遵守因賜輔臣楊一清等冠服各一副令在京在外官民人等不許濫服五彩妝花織造違禁顏色及將蟒龍造爲女衣或加飾妝衫圖利貨賣其朝貢夷人不許擅買違式衣服如違將買者賣者一體治罪遼府光澤王寵滾奏 聖製燕弁忠靜冠服乞併賜宗親

官屠章下禮部議宗室至親與品官稽異宜別降成式或於燕弁上遞從減殺以賜親王郡王世子於忠靜冠上遞加增飾以賜將軍中尉及長史審理紀善教授伴讀俱輔導職宜比在外府州縣儒學官令皆服之儀賓雖有品級非儒流不宜濫及上日光澤王所請謹德慎獨至意待朕別有定制頒行

十二月諭禮部朕酌古玄端之制爲忠靜冠服錫於有位朕已嘗念及宗室諸王其制尚未之備今光澤王所請實獲朕心因酌燕弁及忠靜冠服之制復爲製式名曰保和冠服俾將軍中尉王府等官服之

八年五月初上疑弁冕之制未合典制諭大學士張璠以制有革帶之文今何不見於用璠對曰按陳祥道禮書古革帶皆謂之鞶帶以繫佩鞞然後加以大帶而笏捐於二帶之間夫革帶前繫鞞後綬左右繫佩自古冕弁皆用之今惟不用革帶以至前後佩服皆無所繫遂附屬裳要之間失古禮制矣上曰冕弁用以祀天地享祖親若闕革帶則禮服不備非齋明盛服以承祭祀之意及觀會典載蔽膝用羅上織火山龍三章并大帶緣用錦皆與今所服不合卿可併革帶繫蔽膝佩綬之式詳明繪圖進覽且衣裳分上下服而今衣通掩其裳



裳制如帷幔而今兩幅朕意衣但當與裳要下齊而露裳之六章何如已又諭璉以變更祖制爲疑璉對曰古制衣不掩裳考之大明集禮及會典實與古制不異今訂正之乃是遵復祖制 上意乃決因復諭璉曰茲事既必行須求至當朕仍一一與卿訂定一衣六章古曰繪者畫也今當織之朕命織染局查國初冕服日月冬徑五寸今當從之日月在兩肩星山在後華蟲在兩袖仍玄色一裳六章古曰繡今當從之古色用黃玄黃取象天地今裳用纁於義無取當從古其六章作四行以火宗彝雖虎藻爲二行米黼黻爲二行一革帶卽束帶

後當用玉以佩

蔽膝隨裳色其繡物上

龍一下火三不用三可也卿其詳加思議以告璉以聖裁至當爲對 上乃諭令內閣諸臣同考訂行

十二月 上更制袞冕先出圖說示閣臣下禮官議定禮官以今 上所定冕服說草上圖註不稱旨 上乃諭內閣親定公服所用革帶照舊朝祭服大帶表裏俱素兩耳及下垂緣以綠色就以蔽膝珮綬係之珮玉更復古制裳併三齊如禮官所言且令議方心曲領名義禮官言方心曲領始於隋時非古也 上曰方心曲領古制不傳况始自隋豈可襲用宜革之餘如圖註通行忠

外職官遵行毋得違越仍令各王府官一體更正  
十六年清明節駕發京師扈蹕諸臣朝 上於駐蹕所兵  
部尚書張瓚服蟒衣 上怒諭輔臣夏言曰朕惟名器  
不可輕擅尚書二品也何自服蟒張瓚非不讀書之比  
朝廷之上恐未可肆卿可面問之仍示科道知言等對  
瓚所服乃欽賜飛魚衣但鮮明類蟒耳 上曰爾等說  
是飛魚何組以兩角朝廷所問以大臣不可不先敬忌  
汝等但行回護如朕未見者今後文武官除本等品級  
服用及特賜者不許僭分自恣華異服色還加禁約給  
事中高擢等御史沈一定等復以爲言 上罪擢等不

蚤舉奏各奪俸 五月瓚疏引罪令盡心供職

禮部奉旨查奏文武官服色花樣俱因會典不曾分載因  
而互用殊非法制乞嚴加禁約除本等品級及特賜者  
毋得僭分自恣擅用蟒衣飛魚斗牛違禁華異服色其  
大紅紵絲紗羅惟四品以上官及在京九卿翰林院詹  
事府春坊司經局尚寶司光祿寺鴻臚寺五品堂上官  
經筵講官其餘俱青綠錦綉遇有吉禮止服紅布絨褐  
品官花樣一循品級公侯駙馬伯麒麟白澤文官一品  
仙鶴二錦雞三孔雀四雲雁五白鸚六鷺鷥七瀉瀉八  
黃鸝九鶴鶉雜職練雀風憲官用獬豸武官二品獅子

三四虎豹五品熊羆六七彪八西牛九海馬得衣麒麟者爲錦衣衛指揮得旨如擬命卽出榜文曉諭

二十二年禮部言近日士民冠服詭異制爲凌雲等巾競相馳逐凌僭多端有乖禮制詔中外所司禁之

時內閣嚴嵩徐階李本皆賜服麒麟麒麟公侯服也而成國公朱希忠京山侯崔元左都督陸炳等以玄壇供事特賜服仙鶴仙鶴文臣一品服也學士嚴訥李春芳董份以五品撰玄詞特賜仙鶴袍旣而上海之下諭謂玄壇供事可用鶴餘則不可意蓋爲三臣也而尚書皆疑不敢衣鶴亟市錦雞爲飾而三學士之衣鶴自若也

附宮室輿馬器用

國初著令凡官民服色冠帶房舍鞍馬貴賤各有等第上可以兼下下不可以僭上官員任滿致仕與見任同其父祖有官身沒非犯除名不敘子孫許居父祖房舍及衣服車馬有官者依品級其御賜者及軍官軍人服色不在禁例

洪武三年七月禮部尚書崔亮奏定皇太子以下及文官三品以下武官四品以上上殿者坐墩之制其制皇太子及親王以青爲質綉蟠螭雲花爲飾宰相及一品以赤爲質飾止雲花二品以下蒲墩爲飾凡大朝會

宴賜坐墩退朝燕閒及行幸之處則中書省大都督府  
官三品以上及勛舊之臣文學之官賜坐者仍加絨罽  
綉褥命如其式制之

八月禁凡服色器皿房屋等項並不許雕刻刺綉古帝王  
后妃聖賢人物故事及日月龍鳳獅子麒麟犀象等形  
如舊有者限百日內毀之

上諭廷臣曰古昔帝王之治天下必定禮制以定貴賤明  
等威是以漢高初興卽有衣錦繡綺縠操兵乘馬之禁  
歷代皆然近世風俗相承流於僭侈閭里之民服食居  
處與公卿無異有奴僕賤隸往往肆侈於鄉曲貴賤無

等僭禮敗度此元之失政也中書其以房舍服色等第  
明立禁條頒布中外俾各有所守於是省部定職官自  
一品至九品房舍車輿器用衣服各有差等庶民房舍  
不過三間不得用斗栱彩色其男女衣服併不得用金  
綉錦綺紵絲綾羅首飾釧鐲不得用金玉珠翠靴不得  
裁制花樣金線裝飾違者罪之

有司奏造乘輿服御諸物應用金者命皆以銅爲之  
令京城一二品許用傘蓋其餘止許用雨傘京城外聽用  
十六年令尚書侍郎左右都御史通政使太常卿府尹祭  
酒學士許張傘蓋

景泰四年合在京三品以上許乘轎其餘不許違例在外  
各衙門俱不許乘轎

成化九年命兩京官員油傘遇雨任用其涼傘京城內不  
許張設若出郊在外不拘此限

十三年十一月太監汪直言洪武永樂間人臣無敢乘轎  
者正統時文官年老或乘肩輿景泰以來師保旣多乘  
轎延至於今兩京五品以上無不乘轎者文職三品年  
六十以上可許武職宜一切禁止從之

南京各官舊張傘弘治時爲御史郭維所劾命城中許張  
油傘不得用涼傘

弘治七年申明兩京及在外文武官員除奉有旨及文武  
例應乘轎者止許四人扛擡其兩京五府管事并內外  
鎮守守備等項公侯伯都督等官不分老少皆不許乘  
轎違例乘轎及擅用八人者指實奏聞

正德初令京官三品以上用大扇四品以下用撒扇遮日  
十六年奏准職官一品二品器皿不許用玉止許用金以  
爲定例其商賈技藝之家器皿不許用銀餘與庶民同  
官吏人等不許僭用金酒爵其椅卓木器之類並不許  
殊紅金飾

嘉靖五年八月給事中黎良言舊制京朝四品以下及公

侯伯都督等官不得乘轎軍職不得用馬杙出入不得  
乘小轎邇來勳臣厭馬弗乘以轎相競是果出於朝廷  
之賜與况承前人汗馬之功正當以騎射爲事詩詠鷹  
揚史記飛將上世以驃騎名官我朝以騰驤立衛蓋重  
之也且人久佚必不能以任勞久安必不能以蹈危身  
爲大將手握重兵勞事危機又將委之誰宜量加爵治  
併申舊制 上從其奏詔自今兩京五府及在外鎮守  
公侯伯都督等官皇親駙馬在京四品以下文職在外  
自三司以下官有乘轎軍職有上馬用杙與乘小轎出  
入者參問降調如例卽兵部尚書當下營日亦以騎行

國朝典彙卷一百十二

都察院右僉都御史臣徐學聚 編輯

禮部十

樂制

吳元年七月 上御戟門命選樂舞生召學士朱升范常  
閱試 上親擊石磬學士不能辨以宮爲徵 上詰之  
起居注熊鼎曰八音之中石最難和故書曰於石擊石  
拊石百獸率舞 上曰石音固難和然必以人聲爲主  
人聲旣和卽八音和矣因命樂舞生舞歌一曲 上曰

古者作樂以和民聲格神人而與天地同其和近世儒者鮮知音律之學欲樂和顧不難耶鼎曰樂音不在外求實在人君一心君心和則天地之氣亦和天地之氣和則樂無不和矣

前代朝賀皆用女樂是年上始革去不用

洪武元年十二月命協律郎冷謙考正宗廟雅樂音律及鐘磬等器既又定樂舞之制詳異術

二年七月禮部尚書陶凱等據古禮請每膳用樂上曰

古之帝王功德隆盛治洽生民上下之間洽然太和雖日一舉樂不為過也今天下雖定人民未蘇北征將士

尚在暴露之中此朕宵旰憂勤之不暇豈可忘將士之勞而自為佚樂哉俟大兵凱還士卒無戰伐之勞人民罷轉輸之苦然後以樂侑膳未晚也

九月定朝會燕享舞樂之數凡奏樂曲皆按月律前三奏和緩中四奏壯烈後二奏舒長第一起臨濠之曲名飛龍引次開太平之曲名風雲會次安建業之曲名慶皇都次削羣雄之曲名喜昇平次平幽都之曲名賀聖明次撫四夷之曲名龍池宴次定封賞之曲名九重歡次大一統之曲名鳳皇吟次守承平之曲名萬年春其武舞曲名清海宇文舞曲名泰階平

其十二月按律樂歌正月爲萬年春二月玉街行三月  
賀聖明四月喜昇平五月樂清朝六月慶皇都七月永  
太平八月鳳皇吟九月飛龍引十月龍池宴十一月金  
門樂十二月風雲會  
四年六月命吏部尚書詹同禮部尚書陶凱製宴享九奏  
樂章成上之一曰本大初二曰仰大明三曰民初生四  
曰品物亨五曰御六龍六曰泰階平七曰君德成八曰  
聖道成九曰樂清寧 上命協音律者歌之謂侍臣曰  
禮以道敬樂以宣和不敬不和何以爲治元時古樂俱  
廢惟淫詞豔曲更倡迭和又使胡虜之聲與正音相雜

甚者以古先帝王祀典神祇飾爲舞隊諧戲殿庭殊非  
所以道中和崇治體也今所製樂音頗協音律有和平  
廣大之意自今一切流俗諛諛淫褻之樂悉屏去之  
六年八月學士承旨詹同等上所制釋奠先師孔子樂章  
迎神奏咸和之曲奠帛奏寧和之曲初獻奏安和之曲  
亞獻終獻奏景和之曲徹饌送神俱奏咸和之曲  
九月鑄太和鐘成其制倣宋景鐘以九九爲數高八尺二  
寸拱以九龍植以龍簷建樓於圓丘齋宮之東北懸之  
每郊祀候駕動則鐘聲作既升壇鐘聲止則衆音作禮  
畢升輦又擊之候導駕樂作則止禮官奏曰昔黃帝有



五鐘其一曰景鐘景大也惟功夫者其鐘大故宋之鐘亦緣是以爲名請名之曰景鐘上曰古鐘名宜更之遂取周易保合太和之義更名之曰太和鐘

七年九月上以祭祀還宮宜用樂舞前導命翰林儒臣撰樂章以致敬慎鑒戒之意論曰古人詩歌辭曲皆寓諷諫之意後世樂章惟聞頌美無復古意夫嘗聞諫則使人惕然有警若頌美之辭使人聞之意怠而自恃之心生蓋自恃者日驕自警者日強朕意如此卿等撰述毋有所避翰林院因上所撰神降祥神貺酣酒色荒禽荒諸曲凡三十九章曰回鑾樂歌其辭皆存規諫其舞

分爲八隊隊皆八人禮官圖其制以上命樂工肄習之上命樂人張良才說平話良才因做場壇寫教坊司招子貼市門柱上有近侍人言上曰賤人小輩不宜寵用令小先鋒張煥縛投於水盡發樂人爲穿甲匠月支米五斗

八年十一月詔江陰侯吳良監鑄大鐘於鳳陽

十五年正月上命儒臣重制九奏侑食樂章其曲名一曰炎精開運二曰皇風三曰天眷皇明四曰天道傳五曰振皇綱六曰金陵七日長楊八曰芳醴九曰駕六龍二十七年六月上諭禮部臣曰近命製大成樂器以頌

天下學校俾諸生習之以祀孔子朕思古人之樂所以  
防民欲後世之樂所以縱民欲其故何也古樂之詩章  
節而正後世之歌詞淫以夸古之律呂協天地自然之  
氣後之律呂出人爲智巧之私天時與地氣不審人聲  
與樂音不比故雖以古之詩章用古之器數亦乖戾而  
不合凌犯而不倫矣手擊之而不得於心口歌之而非  
出於志人與樂判然爲二而欲以動天地感神鬼豈不  
難哉然其流已久救之甚難卿等宜救於此俾樂成而  
頌之諸生得以肄習庶幾可以復古人之意

承樂元年九月

上諭侍臣

皇考功德隆盛樂章未有

稱述其議爲之

宣德三年九月大學士楊士奇進平胡鏡歌鼓吹曲詞十

二篇 上喜納之

弘治八年十二月司禮監以祭三清樂章命內閣改補進

呈大學士徐溥言我朝合祭天地皆 太祖所親定樂

器樂章皆 太祖所親製不聞有三清之祭俗曲之音

臣等讀儒書窮聖道道邪妄之說未嘗究心至於鄙

褻詞曲尤所不習且 祖宗置文淵閣學士實欲其謀

議政事講論經史培養本源弼正闕失非欲其阿諛順

旨惟其言而莫之違也故凡奉中旨處分其合理者自

當仰承德音間於民情有干治體相礙亦不敢苟且應命以誤陛下不但樂章一事而已疏入上嘉納之十七年內旨行河南取樂工巡撫都御史韓邦問疏止之正德三年上諭鐘鼓司太監康能等以慶成大宴音樂缺廢非所以重朝廷命禮部移文各省選精通藝業者送京供應自是禁廷之百戲悉集矣

嘉靖二年製興廟樂章迎神曰太和初獻曰壽和亞獻曰豫和終獻曰迎和徹獻曰雍和還宮曰安和

五年上更換世廟樂章迎神用永和初獻用清和亞獻用康和終獻用冲和徹饌用太和還宮用寧和大學

士費宏等言皇上更定世廟樂章欲少異於太廟宜

專用文德蓋以獻皇生長太平不以武功爲尚上

然之

六年六月隨堂何淵言獻廟止文舞宜兼武舞大學士

楊一清等曰漢高以武功定天下故用文德武始惠文

止用文始昭德獻廟不用武舞不爲缺典聰曰祭用

生爵獻皇天子父樂可缺乎且天子八佾諸侯六我

明太廟文武舞各八計百二十八人王國各六計七十

二人獻皇在藩巴用七十二人今追王而六十四人

可乎桂萼曰周禮以司于掌舞器祭統以翟爲樂之賤

蓋音貴人聲容貴于戚去武舞去所貴矣 上曰爾據  
經籍推論甚明其增之

九年 月發內府所藏金玉銅石鐘磬於神樂觀考正音  
律仍令科道各舉曉諳音律者

六月中允廖道南以郊典既正宜稽古定樂以裨盛典給  
事中夏言薦行太僕寺丞張鶚鶚臨清人時在告里居  
乃應詔至欲定元樂復古併進所著樂書二部一曰  
大成樂舞圖自琴瑟以下諸樂逐一作譜一曰古雅心  
談以十二圖象十二律圖各有說乃下禮部議且命卽  
爲更定勿誤廟享之用

十月禮部奏宮中講內訓女訓古者絃歌周南召南不用  
鐘磬乃房中樂后妃夫人所誦習事君子者宜令宮中  
女官將二南詩被管絃以備宮中宴樂斥去一切俗樂  
庶於壺儀有補

十年祀高禩樂九奏舞八佾

十二年禮臣夏言言大雩宜奏雲門之舞雲門堯樂取雲  
出天氣雨出地氣也

十四年禮臣夏言因部司議上言各廟既已特建則樂亦  
宜特設若原日樂章乃國初所作其稱揚止及 德懿  
熙仁四祖如云慶源發祉世德惟崇是已今 四祖久

國朝典章卷二十一 樂制 七  
禋舊章弗協我 太祖創業 太宗定鼎 列聖守成  
神功盛德與天無極當有頌聲以對越在天且執事官  
員并樂舞生見在數少他日各廟供事不敷今照太廟  
原設名數當增協律郎贊禮郎司樂等官四十員樂舞  
生一千二百二十九名宜預選補併樂舞袍服亦宜照  
數如式成造 上是之

六月太常少卿張鶚初以太僕丞薦改太常職典雅樂欲  
設特鐘特磬以爲樂節復宮懸以備古制候元氣以定  
鐘律因開陳正樂俗樂鐘律候氣宮懸等繪圖并說以  
進禮部議特鐘特磬所謂金聲玉振也况羣廟行禮奏

樂尤必得此爲節然後可舉誠宜特設宮懸古制詳見  
周官有宮懸軒懸判懸特懸之別廟庭之中周旋未便  
姑且置之惟候元氣則爲作樂之本請如所奏如法築  
室園丘外垣隙地仍選天文生知曆候者往相其役或  
草澤之中有能明此學者多方物色以共成其事其論  
設特鐘特磬宜令如式成造 上是其議旣而罷之  
十五年論大學士李時以君臣宴會可撰儀註尚書夏言  
言有周盛時君歌鹿鳴臣歌天保今一奏聖喜慶賀之  
舞二奏賓鴻翱翔之舞三奏羣仙朝聖之舞又詔大禘  
樂六奏舞八佾

十七年新廟成 成祖迎神樂別歌三獻撤饌還宮樂如  
 太廟 仁宣英憲四廟樂歌同 孝武二廟迎神樂別  
 歌獻撤還宮樂歌同 睿廟樂別歌異於諸廟立秋時  
 祫禮如夏樂歌異於夏立冬時祫禮如秋樂歌異於秋  
 禮部言古者龍見而雩與啓蟄而郊之意同宜用盛樂先  
 年本部議擬雩壇祈禱禮儀神樂觀正樂外增設鼓吹  
 選教舞童青衣執羽繞壇周旋歌雲門之曲而舞已終  
 撰有樂章而儀物未備宜命所司造舞衣羽旄等物選  
 見在樂舞生年幼質秀者百人敬習歌舞充雩壇用庶  
 鉅典靡闕得旨報罷

山西遼州同知李文察進所著樂書四聖圖解二卷樂記  
 補記二卷律呂新書補註一卷典樂要論三卷因請與  
 正樂以薦 上帝祀 祖考教 皇太子章下禮部覆  
 言文察所進樂書其於禮樂樂聲樂原多前人所未發  
 者且於人聲中考定五音以為制律候氣之本法似徑  
 截深合虞書言志永言依永和聲之旨宜令文察及太  
 常知音律者選能歌樂舞生百餘人協同肄習本部及  
 該寺正官以時按試候聲律諧協吹律候氣咸有應驗  
 更議擢用詔授文察太常典簿協同該寺官肄業  
 十八年以 皇考配享 上帝於龍飛殿樂章皆出御製

十九年掌太常寺禮部侍郎金贊仁言 皇上創立郊廟  
 陵寢社稷諸典其中樂章儀注悉親更定臣先年集為  
 太常總覽一部已付史館今 聖制日新典禮益富謹  
 將增制 九廟崇雩大亨明堂諸儀續葺一冊進呈請  
 增入總覽賜各刊布得旨所進書各太常總紀暫付史  
 館待祀典大定刊刻

國朝典彙卷之一百一十三

〔睽〕

都察院右僉都御史

臣

徐學聚

編輯

浙江布政司右叅政

臣

林贊

訂正

禮部

十一

祥瑞

辛丑年十一月黃河清自平陸三門磧下至孟津五百里  
 皆清凡七日命秘書少監程徐記之十二月石州河清  
 至冰泮始如故

太祖攻婺城未破先一日有五色雲見城西氤氳似蓋城  
 中望之以為祥及城下乃知為駐蹕之地

國朝典彙卷一百一十八 祥瑞  
吳元年四月句容耆民施仁等獻瑞麥 上下令諭民曰  
自渡江以來十有三載境內多以瑞麥來獻丙申當塗  
縣麥生一榦兩岐丁酉上元麥生一莖三穗寧國麥生  
一莖二穗今句容又獻麥一莖二穗蓋由人民勤于農  
事感天之和以致如斯爾民尚盡力畝畝以奉父母育  
妻子永爲太平之民共享豐年之樂起居注詹同進曰  
昔在成周嘉禾同穎漢張堪守漁陽麥秀兩岐今主上  
撥亂世而反之正功德大矣雖戎馬之際亦修農務故  
斯民得脫喪亂盡力田畝天降瑞麥非偶然也 上曰  
天不可必人事則當盡爲國家者豈可恃此而自怠乎

洪武二年四月淮安寧國鎮江楊州台州等府并澤州各  
獻瑞麥 上曰朕爲民主惟思修德致和以契天地之  
心使三光平寒暑時五穀熟人民育爲國家之瑞蓋國  
家之瑞不以物爲也昔堯舜之世不見祥瑞何損聖德  
漢武帝獲一角獸產九莖芝時以爲瑞乃不能謙抑自  
損撫輯民庶以安區宇好功生事卒使國內空虛民力  
困竭後雖追悔已無及矣其後神爵甘露之侈致山崩  
地震而漢德于是乎衰嘉祥無徵災異有驗可不戒哉  
九月禮部尚書崔亮奏凡祥瑞應見皆爲國家休徵按唐  
六典四瑞有大瑞上瑞中瑞下瑞其大瑞景星慶雲麟



鳳龜龍之類上瑞白狼赤兔之類中瑞蒼鳥朱雁之類  
小瑞岐麥嘉禾芝草連理枝之類又按唐令凡祥瑞應  
若麟鳳龜龍之類依圖書合大瑞者所司隨卽表奏百  
僚詣闕上表拜賀告廟頒下其諸郡瑞并令所司轉申  
以聞若鳥獸之類有生獲以獻者仍遂其本性放之山  
野亦有可致者如連理枝之類則不須齋送今擬凡祥  
瑞應見若麟鳳龜龍之類合大瑞者許各處表奏不得  
泛言虛飾干惑上聽其餘諸瑞所在官司驗實圖進  
上曰卿等所議但及祥瑞而不及災異不知災異之來  
乃上天示戒所繫尤重今後四方或有災異無論大小  
皆令所司卽時飛奏

十月甘露降于鍾山羣臣稱賀 上曰休咎之徵雖各以  
類應朕德涼薄烏足致斯翰林雖稼對曰聖人之德上  
及太清下及太寧中及萬靈則膏露降陛下敬恭天地  
輯和民人故嘉祥顯著起居注魏觀曰帝王恩及于物  
順于人而甘露降陛下寬租賦減徭役百姓歡豫禱應  
之至以此侍讀學士危素曰王者敬養耆老則甘露降  
于松柏實陛下尊賢養老之所致宜告于宗廟頒示史  
館以永萬億年無疆之休 上曰卿等援引載籍言非  
無徵然朕存心警惕惟恐不至烏敢當此一或忘鑒戒

而生驕逸安知嘉祥不爲災異之兆乎告諸宗廟頌之  
史館非所以垂示天下後世也羣臣皆頓首謝已而學  
士宋濂入賀因作頌以進 上旣受賀乃復召濂詢以  
災祥之故濂對曰受命不干天于其人休符不干祥于  
其仁孔子作春秋祥瑞不書有年則書豈不以天道玄  
遠難知而人事可徵乎 皇上留神至治以得仁賢爲  
瑞以臻和豐爲祥視前代植金莖以承液誇嘉瑞以紀  
年者未嘗不指以爲戒則英明之識超絕之智卓冠百  
王爲法萬世 上曰然先正云頌不忘規濂近之矣

三年四月寶雞縣進瑞麥一莖五穗者一本三穗者一本

二穗者十餘本 上曰鳳翔饑饉朕特遣人賑恤今未

數月遽以瑞麥來獻使鳳翔民未粒食雖有瑞麥何益  
苟其民得養雖無瑞麥何傷朕觀自古以來天下無金  
革鬪爭之事時和歲豐家給人足父慈子孝夫義婦順  
兄愛弟恭此足爲世瑞麥特一物之瑞非天下瑞也

五月陝西靈寶縣進瑞麥一莖五穗者一本三穗者二本  
兩穗者十有餘本弘文館學士劉基撰頌以進

四年七月 上謂丞相汪廣洋曰朕觀前代人君多喜佞  
諛以飭虛名甚至臣下詐爲瑞應以恣矯誣至于天災  
垂戒厭聞于耳如宋真宗亦號賢君初相李沆日聞災

國朝典彙卷三十一  
其心猶存警惕厥後澶淵既盟大臣首啓天書以後  
其心群下曲意迎合苟圖媚悅致言祥瑞者相繼于途  
獻芝草者三萬餘本朕思凡事惟在于誠况爲天下國  
家而可以僞乎爾中書自今凡祥瑞不必奏如災異及  
蝗旱之事卽時報聞廣洋叩首曰陛下敬天勤民孰大  
於此非惟四海蒼生蒙福誠聖子神孫萬世之謨訓也  
十月甘露降于鍾山  
五年正月五色雲見

六月句容民獻嘉瓜二同蒂而生 上御武樓中書省率  
百官進禮部尚書陶凱奏曰陛下臨御同蒂之瓜產於

句容句容陛下祖鄉實爲禎祥蓋由聖德和休國家  
慶故雙瓜連蒂之瑞獨見於此以彰陛下保民愛物之  
仁非偶然者 上曰草木之瑞如嘉禾並蓮合歡連理  
兩岐之麥同蒂之瓜皆是也卿等以此歸德於朕朕否  
德不敢當縱使朕有德天必不以一物之禎祥示之苟  
有微過必垂象以譴告使我克謹其身保民不至於禍  
殃且草木之祥生於其土亦惟其土之人應之於朕何  
預若盡天地間時和歲豐乃王者之禎故禎祥不在於  
微物遂爲贊賜其民錢千二百  
按是年嘉瓜並蒂產于句容張穀賓之圃群臣上進

上目作贊不以祥瑞自居學士宋濂爲頌以進未幾張氏兄弟坐事駢斬於市子姪充軍者數人瑞乎妖乎然今張氏族頗大天下稱爲嘉瓜張氏云

八月河南民獻白兔命放之野

十一月甘露降

六年五月盱眙民進瑞麥十六本皆一莖二穗御史答祿與權言天產嘉祥以兆國家之福而爲聖世之徵今瑞麥之產乃上帝借草木之靈以彰君臣異體同心之象又產于盱眙屬臨濠帝鄉也是宜薦之宗廟以彰祖宗之神靈且新麥之登尚薦宗廟况瑞麥乎 上曰以瑞


麥爲朕所致則不敢當必歸之祖宗神靈御史之言良是乃命薦之宗廟

七年十一月甘露降于鍾山誠意伯劉基作頌述

八年十一月甘露降于園丘青松上時 上詣齋宮省視

壇場採而嘗之甘如飴糖儒臣咸獻歌詩以頌 上曰人之常情好祥惡妖然天道幽微莫測若恃禱不戒未必皆吉覩妖能懲未必皆凶朕德不逮惟圖修省之不暇豈敢以此爲已所致哉因著甘露論示群臣

十八年四月五色雲再見禮部請率百官表賀 上曰朕德不逮治化未臻豈可遽以受賀前代帝王喜言祥瑞



臣下從而和之往往不知省懼至災異之來不能復弭  
蓋夸侈之心生則敬慎之志怠故鮮克有終可以爲戒  
二十一年五月五色雲見劉三吾進曰雲物之祥徵于治  
世堯舜之時興于詩歌此實聖德所致 上曰古人有  
言天降災祥在德誠使吾德靡悔災亦可弭苟爽其德  
雖祥無應國家之慶不專于此也

二十八年七月河南確山縣野蠶成繭群臣表賀 上曰  
人君以天下爲家使野蠶成繭足以衣被天下之人朕  
當受賀一邑之內偶然有之何用賀爲

成祖靖難師至紫荆所服素紅絨袍忽見白花如雪色  
爲龍紋鱗鬣皆具美如刺繡諸將見者駭異以爲嘉兆  
上曰冰花偶然所凝豈可遽言嘉應况當戒慎之際不  
可以此爲喜而有怠心

永樂二年七月禮部尚書李至剛奏今歲山東郡縣野蠶  
成繭綿絲進獻請百官表賀 上曰野蠶成繭使徧於  
山東之地亦不過衣被一方而未及於天下朕之心必  
天下之民皆飽煖而無饑寒方可爲朕賀也止之

九月周王橚以騶虞來獻先是周王畋于鈞州獲一獸白  
質黑章貌首虎軀其狀孔威不可迫視王命部卒俟之  
其性孔仁遂擾致之因召父老以詢咸謂騶虞云王率

其屬表獻闕下。上服皮弁御奉天殿視之不震不動。柔伏自然。上顧謂王曰：厥爲嘉瑞，朕罔敢知維彼自昆弟之邦，朕甚嘉焉。淇國公丘福率百官稱賀。上曰：祥瑞之來，易令人驕，是以古之明主皆遇祥自警，未嘗因祥自怠。警怠者國之安危繫焉。騶虞若果爲祥，在朕更當加慎。是日宴周王于華蓋殿，其從官宴于中右門。十二月禹門渡黃河清，亘數百里。明年正月上日，高平王暨平陽王俱拜表恭賀。二月秦王復以表聞，祭酒胡儼作河清賦以獻。

三年七月陝西興平鳳翔獻瑞麥，群臣表賀以爲聖德。被之應天下太平之徵。上謂禮部尚書李至剛等曰：瑞麥固是嘉應，但四方遠邇靡一物不得其所，斯可爲太平。今中外果無匹夫匹婦之愁怨于下者乎？覽表祇益慙愧耳。君臣貴相與以誠諛，佞非治世之風也。

九月關陝奏獻嘉禾數穗，同一莖，儒臣撰詩以進。初，洪武二十八年九月北平禾有異莖同穗之祥。上爲燕王時進。太祖親御翰墨爲詩一章以賜。上佩誦，追惟乃用摹勒于石，拓本成軸，至是復有嘉禾之瑞，遂以分賜諸王及京師三品以上翰林近侍國子祭酒司業。四年六月南陽府獻瑞麥。上語禮臣曰：比郡縣屢奏祥。

瑞獨此爲豐年之兆若年穀豐登民足衣食老少無凍餒之患皆天地祖宗之賜矣命薦之宗廟

十一月庚申上修舉金籙齋法于朝天宮神樂觀洞神

宮追薦皇考皇妣甲子慶雲見朝天宮乙丑甘露

降于宮樹丙寅慶雲復見巳既訖事甘露復降孝陵

松柏醴泉出神樂觀上命中使取獻宗廟分賜廷臣

群臣上表賀聖孝瑞應上以因祥思懼不宜怠忽

申飭之侍臣楊士奇等俱有詩頌

六年三月巡按福建御史趙昇及布按二司奏以柏生花爲瑞上賜勅切責曰朕主宰天下生民休戚未嘗徧

知故委爾等鎮撫藩方以圖安輯乃肆志安逸軍民疾

苦一毫不言而言柏花爲瑞夫時和歲登物無疵癘生

民足食四夷順安此國家之瑞也爾等驗之人事歲果

豐登民果給足乎樹木之花世所常有何益于國何利

于民而以爲瑞也相爲朋比諛佞忠君卹民之心安在

哉始曲宥爾等復爲欺罔雖欲倖免不可得矣

蘇州楊州言檜花爲瑞上曰近蘇松諸郡水澇爲災

有司往往蔽不以聞昨有奏柏花爲瑞者已責其欺罔

今又言檜花小人之務諛說可惡遂降璽書切責之

七年三月交趾進白象恭寧侯陳珪率百官表賀上曰

卿等但盡心爲國爲民以副朕望白象世常有者勿賀  
七月密雲縣民獻嘉禾賜鈔二十錠先是行在禮部尚書  
趙徂以禎祥叠見若兩岐之麥野蠶成繭日食不見之  
類皆欲稱賀上悉却之至是又因獻嘉禾欲率廷臣  
表賀上曰古之帝王爲治尚敦實黜浮華朕德弗逮  
但得四叙協和海宇康乂黎民衣食給足卽國家之福  
一物之異皆偶然耳何以賀爲遂止

八月山西繁峙獻嘉禾二百七十九本禮部請賀上曰  
朕奉天子民正願天降豐年使四海皆足今蘇松水患  
未息保定安肅處州皆雨雹渾河決于固安傷禾稼且  
四方之廣尚有未盡聞者不聞群臣一言弭災之道而  
喋喋于賀嘉禾謂禎祥朕德所致夫災異非朕所致乎  
爾等宜助朕修德行政他非所欲聞也

十月北京有白鵲之瑞行在禮部行南京慶賀自監國下  
及五府六部例各進表時楊士奇以病在告監國表命  
庶子贊善撰呈稿太子不懌命尚書蹇義持以示士  
奇曰甚寂寥且不著題以賀白龜白鹿皆可命士奇改  
一對云望金門而送喜馴彤陛以有儀後增一對云與  
鳳同類踰躑于帝舜之廷如玉其輝翯翯在文王之囿  
義以進太子喜曰此方是帝王家白鵲適內厨進膳



遂命內使陳昂撤以賜士奇且傳旨諭之曰其勉進藥食早出非但倚卿文學久不聞直諫之言慮有過不知急欲得相見也

八年二月車駕次永安甸雨雪已而復霽日下五色雲見八月辛酉旦老人星見丙位色赤黃

十年七月浙江平陽縣獻嘉禾百六十四本上謂尚書夏原吉曰嘉禾雖豐年之祥然今四方數奏水旱未必皆豐宜遣人巡視存卹不可恃此原吉等頓首曰陛下存心于此實社稷蒼生之福

八月丙寅壽星見丙位

十月十一日命皇太子演武于方山是日甘露降十六日大駕狩于陽山甘露大降二十五日大駕復幸武岡山甘露又降珠凝玉潤其甘如飴以頒賜從臣翕然贊歎以爲萬世太平之福明日文武諸臣稱賀祭酒胡儼作頌以進

山西繁峙進嘉禾百五十八本

十一年五月曹縣獻騶虞禮部尚書呂震奏稱上瑞請率群臣表賀上曰百穀豐登雨暘時若家給人足此爲上瑞騶虞何與民事不必賀震固請上曰大臣之道當務爲國爲民汝能效李沆爲人則善矣震退上顧

侍臣曰震可謂不學無術者也

十一月山東民有獻野蠶繭絲者群臣奏賀瑞應 上曰此祖宗所祐也特命織帛染柘黃製衾命 皇太子奉薦太廟

十二年九月榜葛刺國王賽弗丁遣使奉表獻麒麟禮部請上表賀 上曰卿等但當夙夜竭心輔治以惠天下天下既安雖無麒麟不害爲治其免賀

十三年二月貴州布政使蔣廷瓚言去年北征班師詔至婺州縣大巖山有聲連呼萬歲者三咸謂 皇上恩威遠加山川效靈之徵呂震請率群臣表賀 上曰人臣

事君當以道阿諛取容非賢人君子所爲呼噪山谷空虛之聲相應理或有之布政司官不察以爲祥爾爲國大臣不能辯其非又欲進表媚朕非君子事君之道也十一月呂震奏麻林國進麒麟將至請于至日率群臣上表賀 上曰往者翰林院修五經四書性理大全書成欲上表進賀朕則許之麒麟有無何所損益其已之十四年七月鎮守寧夏寧陽侯陳懋進嘉禾二實同蒂八月癸酉旦壽星見欽天監以聞尚書呂震率百官請表賀 上諭之曰朕惟 太祖高皇帝膺受天命掃除群雄創業垂統立綱陳紀以安天下臻茲太平是以上天

垂象屢顯鴻應揆朕涼薄曷克膺茲矧天道無常惟德是輔凡爲臣民能遵守高皇帝成憲爲子盡孝爲臣盡忠奉公守法安分守已用成福祐國家之祥孰大于此爾文武臣僚宜各盡心輔朕不逮國家有永遠之安爾等暨爾子爾孫亦同享永遠之福壽星其勿賀

十五年七月戊寅旦壽星見百官請賀上曰比歲壽星見卿等以爲瑞然四方旱澇蝗疫比比有之而鮮有爲朕言者朕之所願時和歲豐天下之人俱得其所賢者在位讒慝不作百官舉任其事政平訟理國家清明此可爲瑞壽星之瑞不足賀

十一月建北京奉天殿乾清宮已未督工恭寧侯陳珪等奏二處俱現五色瑞光慶雲瑞靄氤氳流通爛徹霄漢庚申金水河水凝異瑞暎具諸象至已巳卿雲呈彩五色輪囷變化卷舒彌滿殿間卿雲內又出五色瑞光團圓如日正當御坐已而西慶宮苑映上所御殿廷終日不收官軍人等衆目共見呂震率群臣表賀上諭曰朕德涼薄託于萬姓之上懼弗克負荷夙夜祇事不敢暇豫比歲以來卿等一遇祥異輒進表賀顧朕冥昧寧不自知夫戒謹者治之所興宴安者亂之所自卿等宜精白乃心勵臣職奉成憲用以輔朕共承天休書曰

后克艱厥后臣克艱厥臣政乃又其母因是遂有怠心  
十六年正月陝西耀州民獻玄兔呂震請賀不許

十七年九月丙辰卿雲見欽天監言占書卿雲喜氣也太  
平之應又曰天子孝則卿雲見君聖臣賢天下順心則  
日旁氣如龍鳳茲實上瑞行在禮部請率百官表賀勅  
免之且諭曰昔帝舜之世萬邦協和故百工有卿雲相  
和之謠朕寢食之間恒慮政事有缺民生未安安敢恃  
此爲祥縱上天委貺朕與卿等當憂勤惕厲以答天眷  
何以賀焉

十一月甘露降于孝陵之松柏時 皇太子監國遣人採

獻 生祇薦宗廟頒賜百官儒臣進表賀

十八年九月山東諸城縣進龍馬縣馬嘗有牝於海濱者  
一日雲霧晦暝有物蜿蜒與馬接至是產駒鱗臆肉髮  
體具龍文其色青蒼蓋龍馬云

二十一年八月禮部侍郎胡濙進瑞光圖及榔梅靈芝且  
奏太嶽太和山頂金殿現五色圓光紫雲周匝不散又  
山石產靈芝呂震率百官進賀 上曰朕創建太和山  
宮殿上資福于 皇考 皇妣下爲天下生民祈福初  
非爲已且朕德涼薄不敢恃此爲祥其勿賀

洪熙元年正月南京龍山產靈芝蕃大特異守臣以進禮

部請賀不許

三月癸酉五色雲見

八月魯王肇輝遣長史進瑞粟呂震以豐稔之應請賀

上曰近畿內屢奏水潦卿不聞乎朕方夙夜憂民艱食以此爲瑞則山東一隅之民當之如他處何勿賀

宣德四年二月襄城伯李隆獻騶虞二云出來安縣石固山素質黑文馴狎不驚命群臣觀之禮部尚書胡濙等請賀上曰禎祥之興必有實德庶幾副之朕嗣位四年中外豈皆得人民生豈皆得所騶虞之祥于德弗類唐太宗曰堯舜在上百姓敬之如神明愛之如父母動

作興事人皆樂之發號施令人皆悅之是大祥瑞朕與卿等宜共謹之若騶虞其免賀

寧夏摠兵寧陽侯陳懋進玄兔白兔各一賜蟒衣玉帶

四月寧夏守臣復進玄兔大學士楊士奇進瑞應詩

七月廣東海陽進白鳥二胡濙請率群臣賀上曰祇敬

祖宗恭養聖母職分當然何賀之有感瑞之云良增

慙愧朕夙夜祇念祖宗付託懼弗負荷惟賴爾群臣

同心同德贊輔不逮溢美虛辭非所樂聞其止勿賀

五年七月勅諭文武群臣禮部言山西所進龍馬駒以爲

瑞應群臣同上表賀朕自承大統孜孜夙夜期與華夷

國朝典彙卷一百一十三  
同臻康泰幸數年以來國家平寧歲屢有收百姓粗安  
邊圉清肅此皆天地祖宗之佑群臣贊輔之力方切敬  
慎惟懷永圖夫年穀歲登生民給足仁賢効職四裔順  
服禮義興于閭閻武備修而不用此有國之祥瑞也朕  
與卿等共祗勉之一獸之異未足爲瑞其止勿賀

四川茂州守臣進瑞麥有一莖三穗五穗者時 太廟之  
側產嘉禾有一莖四五穗至六七穗者禮臣請表賀

上曰瑞麥嘉禾固是豐年之慶但朕以非德居位且比  
來四方屢奏水旱可言賀耶然產于 太廟側實天與

祖宗神靈之所敷佑昔周人貽我牟麥之詩必歸于先

公之德 上帝之命朕何德以致此其勿賀

閏十二月二十一日夜合譽星見于九游大如彈丸色黃  
白光輝有彗欽天監言占法合譽瑞星爲君上施孝德  
典禮樂人民和悅夷狄奉化來朝之應于是群臣忻悅  
忭舞皆以爲 皇上聖德所感國家隆盛永遠之慶奉  
賀上表聖心謙抑推而弗居且賜璽書戒勵彌至

七年五月忻州民武煥家馬生駒鹿耳牛尾玉面瓊蹄肉  
文被體如麟巡撫于謙同巡按三司視之咸謂爲龍馬  
輿而進之胡濙請表賀 上曰二三年水旱告災者踵  
至朕方旦夕憂勵一獸之微何救民饑而欲表賀止之

八月陝西永壽等縣獻嘉禾有同本三莖或五莖莖十數穗穗一尺有餘者有同本十九莖或二十莖莖十餘穗又多至數十穗者又有一莖五岐六岐或一節一岐者上覽之謂群臣曰諸物不足爲瑞穀以養民今蕃異如此可以爲瑞是日又有獻嘉瓜者胡濙言瓜連理而生有瓜瓞綿遠之兆二者皆禎祥請奉表賀上不許曰嘉禾瑞瓜雖年豐物阜之應皆天地宗廟之所垂佑朕何德以致之夙夜內省有歉多矣其止勿賀

八年八月胡濙言景星見西北方天門占書天子至孝任賢使能海內歡悅制作合天法令清明則見今觀斯瑞實聖德太平之應請偕群臣表賀上不許勅曰古人有言時和歲豐爲上瑞今陰陽不和水旱爲災四方告饑不可勝紀朕每念天與祖宗付託之重內慙于心夙夜祗懼星文之瑞何救民饑而表賀哉聖賢之心惟德是敬恒欽天以自度不因祥而自矜爾群臣尚其夙夜同心同德佐朕于理治政事者以安民爲本典軍旅者以武備爲重任刑法者以平恕爲要敬慎行之毋懈毋怠庶用下慰四海生靈之顛望上答天地宗廟之付託而吾君臣亦得同享無窮之美其止勿賀

閏八月南海外諸番國獻麒麟四少傅楊士奇等進頌

編修許彬以麒麟獅子福祿玄虎四祥進 按福祿乃番人所名福狸狀如騾其文白黑相錯勻瑩可觀乃王會所無者

九年八月甘肅守臣獻龍馬其耳額頷及鬃尾皆肖龍而全體潔白如雪鬃毛層疊狀若波文騰驤卓犖有躡雲追電意氣獻者云其牧之池而池下有龍常雲雨晦冥風雷交作于上勅賜群臣觀之請上表賀勿許

大學士楊士奇進龍馬歌納之士奇云西北乾位也回天馬所自出而龍乾象也故又為龍馬瑞牒云龍馬仁馬也應德而至又云龍馬太平之應也誠由 皇上仁風

義澤敷洽天下是天降靈瑞以彰 皇上大德以垂太平之慶宜有詠歌協諸樂府以宣揚鴻烈于悠久

十年九月四川龍州宣撫司以瑞麥來獻有一莖六穗七穗者 英宗曰所在旱蝗相聖獨此瑞麥何以免民之饑乎其令天下自今凡若類毋獻

正統七年九月鎮守陝西都督鄭銘等奏西安府并耀州嘉禾一莖二三穗四五穗至數十穗者三百餘本胡濙等請賀勿許

景泰二年正月南京禮部奏山川壇醴泉見先是 上改元詔凡有災異不時奏聞言祥瑞進諂者罪之至是



南京太常寺道士顧學誠于山川壇并汲水酒氣芳馨  
水色黃白以告署奉祀羅輔遂報于守備太監袁誠曰  
此醴泉也兵部尚書王驥及府部諸司詣井取薦于奉  
先殿然後以聞有旨報罷祥瑞之說遂息  
成化六年春甘露降于郊壇松柏 上親御齋宮取以賜  
百官大學士彭時翰林學士尹直撰甘露頌以進  
弘治十四年二月保定府臣獻白鴉以爲祥瑞禮部尚書  
傅瀚劾其不當奏詔斥遣之  
正德二年八月黃河清慶雲見翼軫分野是月 世宗生  
于典邸蓋其兆云

七年正月黃河清自清河至柳家浦九十里清五日  
嘉靖元年江西叅議王喬齡奏 獻皇帝始封之國舟泊  
龍江關慈烏萬數集江柳向舟鳴噪提學副使李夢陽  
恭述文集可考其事神異宜錄付史館禮部議覆詔可  
六年十二月河南靈寶知縣張廷桂奏是月庚申馮佐村  
黃河澄清凡五日不于他處而于馮佐詩稱馮翼孝德  
史稱中興賢佐今聖天子在上登庸賢俊赫然中興萬  
世太平之應也 上曰黃河澄清實効靈異皆賴上天  
庇祐宗社錫福人民所致乃遣官祭告 上復紀之以  
詩旣而御史周相諫阻告祭 上怒繫相詔獄奪其官

七年正月甲戌朔甘露降于長泰安溪等縣欽化諸里南  
贛汀漳撫臣汪鉉上言元日降甘露稽諸載籍聖王之  
德上及太清下及太寧中及萬靈則甘露降皇上仁孝  
之德追隆舜武敬一之心媲美湯文名號正而倫理明  
禮樂興而刑罰中至和感召有此禎祥 上覽奏曰甘  
露呈瑞以爲朕仁孝感格之徵夫豈敢當朕非好爲祥  
瑞然天意所至人不敢違惟奉天求庇民物以答靈祝  
仍遣官祭告于宗廟頒賜廷臣

四月大學士楊一清等奏謝賜甘露 上曰分給卿等甘  
露非朕恃祥自矜上天所賜守臣來進朕不敢私先薦  
於祖考餘欲徧賜群臣不能特以一二賜聖卿等交修  
朕躬贊予致治庶可承天眷耳覽所稱頌惟慙

黃河清五十里禮部請遣官致祭及上表稱賀 上曰上  
天錫佑河神效靈其遣官太常賞祀往祭以答神祝不  
必上表賀其該縣奏報官役仍各賚以銀幣有差  
八年巡撫四川都御史唐鳳儀獻樂至縣所產瑞麥一莖  
五穗 上曰撫臣奏獻瑞麥具悉誠意可盡心撫安人  
民共答天貺

巡撫南贛都御史汪鉉獻甘露賜金幣

九年河南巡撫都御史徐瓚奏瑞麥一莖二穗者百本

上嘉獎之賜以銀幣仍薦之內殿未幾聽選訓導范仲斌以原籍巴縣所產瑞麥獻有一莖五穗者京師人又言瑞禾生于郊禮部尚書李時疏請稱賀不許再請許之大學士張璠作嘉禾頌以獻

十二月甘露降顯陵安陸守臣奏上之上乃出郊昭謝

天貺于園丘祭告世廟頒賜廷臣仍製欽天記頌以示後世侍讀學士夏言撰寶露頌以獻令付史館

十年八月鄭王遣使獻白鵲二時會四郊典禮告成禮部請賀而白鵲適至上喜獻于太廟以彰天休禮部侍郎夏言進瑞鵲頌令付史館

曲周縣產嘉瓜并蒂者二瓜中更生枝蔓者一縣丞侯廷訓繪圖以聞上奇之以示禮部禮部以爲本支繁衍之兆上乃親獻內殿賜廷訓衣一襲

十一年十一月四川撫臣宋滄獲白兔于梁山縣以獻禮部尚書夏言等請獻之太廟呈于兩宮太后前百官表賀上曰茲兔罕有良由和氣所感而忠臣賢士推爲瑞此在我祖宗與古帝王可以當之朕以菲薄安可受賀疏再上從之吏部尚書汪鉉學士蔡昂各獻詩尚書夏言少詹事張潮學士席春祭酒林文俊編修張袞各獻頌禮部侍郎湛若水獻演雅學士廖道南王

教修撰姚涑各獻賦倫以訓獻歌 上皆優答

十二月學士郭維藩獻白兔賦忤旨責令對狀褫其職

十二年河南巡撫都御史吳山獲白鹿于靈寶縣以獻夏

言請告獻 太廟 世廟百官表賀 上諭令擇日告

獻併呈于 兩宮皇太后不必表賀言固請乃許之

大學士李時方獻夫翟鑿各以白鹿呈瑞奏獻鹿詩一章

吏部尚書汪鋐修撰王用賓編修董承叙各獻頌禮部

尚書夏言侍郎湛若水席春學士蔡昂修撰姚涑編修

張袞祭酒林文俊各獻賦詹事顧鼎臣獻樂章吏部侍

郎張潮侍讀王教各獻詩 上皆優答

三月應天撫臣陳軾得白兔于無錫縣以獻命留飼內苑

夏言以白兔雖產東吳與西蜀所獻同乞免稱賀 上

曰白鵲鹿兔已屢行獻賀之禮今後或有重至不必復

舉仍令天下果非正瑞自至者勿報于是汪鋐作詩三

章美 上謙冲之德 上褒答之

十三年四川雲陽縣民夏瑀柏獲異石以獻云用水灌可

照人影通政使陳經言瑀柏小民當呈之有司不當徑

詣闕下以開進獻之端下戶部辨驗無狀第據西域賈

胡言爲禱雨所用札冊石旱時置泉內呪之可致雲雨

命收入內庫

十六年徽王厚燭得白兔換頌以進詔嘉王忠愛兔留宮  
中頌送史館報書回賜如鄭府例禮部尚書嚴嵩等言  
白兔爲瑞前代稱奇自上臨御及今再見且當九  
廟告成之後聖嗣降生之初產于中州應期適至與  
前四郊甫畢鄭府奏進靈鵲先後同符宜卜日恭獻  
九廟兩宮以承靈貺仍聽群臣上表稱賀上不許  
十七年正月甘露降龍溪縣巡按福建御史李元陽進甘  
露九翬詔留宮中禮官請薦廟稱賀上曰寶露之  
降實拜天庥朕躬謝于玄極寶殿薦宗廟奉兩宮  
頒賜大臣百官表賀已之

十八年 月乙巳卓午景雲見縹緲五色夏言顧鼎臣以  
聞上命禮部擇日昭謝禮臣嚴嵩請于翼日祈穀禮  
畢御奉天殿受賀上命免賀獨擇日昭謝焉  
永城知縣劉瑤奏進瑞麥一莖七穗者二本上曰麥粒  
我民允爲至寶朕當勉修敬德以答帝貺

七月水火木金四星聚東井

二十三年八月泰安知州馬逢伯奏獻瑞麥嘉禾上曰  
禾麥之祥民食所關天地洪恩不可不敬其擇吉奏謝  
玄極寶殿獻于祖廟會西苑亦獻瑞穀張璧因請上  
御奉天殿群臣致辭稱賀上曰瑞在稼穡非珠玉不

可食者比况禁苑之秀又當雩禮成上天恩賜豈可輕視仰承洪眷尚未奉謝玄恩受賀不可也

月內苑嘉禾生一莖雙穗凡六十有四雩壇靈黍五出者一上諭大臣曰田內見雙穗仰天地所賜與周禾漢麥不同且六十四數卦之正也又雩壇內黍五出者一夫元始生懸一珠大如黍又黍爲五穀之先皆太上垂示且今年非多雨則虜又逞犯數者不可不知玄恩以崇天道卿等其語禮官太上玄恩不可慢視故會所司者知之禮部請百官稱賀上曰爾等有言周禾漢麥不爲祥不必虛敬但不可訕君毀道耳

二十四年正月黃岡縣生員劉大煜奏進瑞兔賜采段一表裏鈔五百貫

八月永和王知煥進白鹿賀萬壽聖節禮部請告獻稱賀上曰瑞應誠荷上天眷錫依擬擇吉告廟免稱賀賜王常服一襲銀五十兩紵絲四表裏

二十五年成國公朱希忠等以醴泉出疏賀上曰苑殿醴泉獻瑞朕祇承皇穹眷佑欽戴惟深卿等陳賀覽奏具悉禮部尚書費家進醴泉頌詔留覽

二十七年西苑奏登嘉穀雙穗七十五本賜督理農事戶部侍郎李士翱彩幣羊酒禮部請獻太廟宣付史館

行慶賀禮 上以昊天降祥事關民食非他物比從之  
三十三年七月西苑產嘉穀三穗雙穗百五十一本會鄭  
府盟津王子祐禧復獻嘉穀雙穗者七十八本命擇日  
告獻 祖廟禮部請宣付史館率百官賀報曰一本二  
穗舊稱禾瑞天賜玄休不可慢忽今夷狄作亂水火疫  
流皆謂上所主任事之臣不盡心處置何以賀爲

三十五年八月詔有司採芝 上問禮部古用芝草入藥  
產于何所求之得否具以狀對尚書吳山等對言本草  
芝有赤白青黑黃紫其色不同其味亦異然皆云久食  
輕身論衡云芝生于土土氣和故芝草生瑞命記云王

者德仁則芝草生文選云煌煌靈芝一年三秀漢書儀  
云芝有九莖金色綠葉朱實夜有光黃帝內傳云王母  
遣仙歌萬年長生之曲授帝以石函玉笈之書會閩風  
瑤池之上授神芝圖十二卷然世不常有服食之法亦  
未有傳 皇上體道奉玄芝草自將應時挺生遠近必  
有獻者所產之地臣未敢預擬詔有司採諸玄嶽龍虎  
三茅齊雲及五嶽仍訪之民間會宛平民張臣祐得芝  
五本獻之 上悅賜銀幣自是臣民獻芝者紛紛矣  
三十六年十月玄嶽諸山獻芝千有餘本先是 上屢諭  
玄嶽諸處採獻鮮芝逾九月者勿上至是共獻一千四

百十本已而巡按北畿御史馬思臧獻二十本巡撫河南都御史潘恩獻三十有三本布政司林懋和獻二十有二本巡按北畿御史路楷獻二十有一本四方繼上者不勝計鄂縣民亦獻一百八十一本賞以金幣三十七年巡撫應天都御史趙忻獻芝二十四本巡按莫如士獻二十本山東巡按段顧言獻二十七本湖廣巡按黃孝瑞獻四十六本河南巡按楊惟平獻二十五本西苑上嘉禾五本 上命薦于 太廟群臣表賀四月總督浙直都御史胡宗憲得白鹿舟山獻之 上悅賜銀幣禮部請告廟受賀得旨上天眷佑賜瑞非一今

奸臣叛氓南北勾賊本欺謫我事上玄宗憲人心不泯以此瑞上之豈可忽慢其命公朱希忠代獻太廟表賀自卿等言已見敬天事君至意自朕言非愧且惡已之閏七月西苑進瑞穀一本三穗者一雙穗者五十五賜督理農事戶部侍郎高燿銀二十兩綵幣一襲命公朱希忠告獻 太廟群臣表賀胡宗憲再獲白鹿于齊雲山獻之 上謂一歲中天降二瑞恩眷非常命公朱希忠告謝于 玄極寶殿伯方承裕告 太廟以宗憲忠敬陞俸一級百官表賀十月禮部類奏四方所進芝一千八百六十四本詔有徑



尺以上者仍廣求以進

三十八年八月巡撫鳳陽僉都御史李遂獻白兔二禮部  
請遣官告廟百官於大明門稱賀 上命公朱希忠告

太廟百官免賀

三十九年八月胡宗憲獻芝草五白龜二 上悅名龜曰

玉龜芝曰仙芝賜宗憲銀五十兩金鶴衣一襲禮部因  
請謝玄告 廟許之

十二月巡撫陝西都御史程軌巡按御史李秋疏獻白鹿  
芝草各一云得之部內書堂山萬壽宮中 上以玄祥  
疊至歸恩 天眷賜輓等各綵帛二表裏鈔二千貫禮

部疏請謝玄告 廟許之

四十年正月陝西獻白鹿時白鹿出嵩南山萬壽宮前芝  
叢中土人得之撫臣權鹿采芝以獻群臣表賀

三月南京錦衣衛指揮徐繼勛獻白兔云得之鳳陽鳳凰  
山下遣公朱希忠告 太廟群臣疏賀

八月御田產嘉穀異類同本者四十九田官以獻群臣表  
賀

十月禮部奏四方所進鮮芝共七百六十九本其五色盈  
尺者尚不得多請申論明年加意採取從之

十一月淮王厚燾得白鴈一隻于鄱湖以獻 上嘉王誠

國朝典彙卷三十一 禮部  
敬賜金文幣遣駙馬都尉謝詔告 太廟群臣疏賀

四十一年二月大學士嚴嵩孫錦衣衛都指揮鵠獻玉兔  
一靈芝六十四本方士藍道行獻瑞龜詔遣公朱希忠  
獻 太廟群臣上表賀

四月陝西鄠縣散官王金進靈芝五色龜 上大喜詔授  
金太醫院御醫仍諭禮部龜芝五色既全五數又備豈  
非上玄之賜乃命公朱希忠告 太廟群臣上表稱賀  
瑞兔又生子二 上言玄恩重示延生之祥特爲罕遇乃  
建謝典命駙馬謝詔告 太廟免百官賀

七月內苑獻穀一莖三穗者二兩穗者三十一群臣表賀

十一月顯陵守備太監張方奉祀蔣華等奏冬至日甘露  
降顯陵之松樹採取以獻 上大悅以示嚴訥言在昔

黃帝唐堯本朝惟 太祖 成祖嘗致斯瑞今顯陵乃  
二聖發祥之地而冬至乃一陽來復之期斯地斯時音  
逢妙合宜令百官稱賀以昭聖孝感通之徵 上從之

四十二年正月甘露復降于 顯陵松柏守備太監張方  
以獻 上悅宣諭百官遣定國公徐延德往祭 顯陵  
加方恩 一等守臣及供奉 園陵者各賜銀幣有差

八月御田產嘉穀一莖四穗者三本三穗者六本兩穗者  
八十有一本田官以獻群臣表賀

御苑龜生卵者五群臣表賀

巡撫湖廣都御史徐南金獻白鵲言出自景陵群臣表賀  
四十三年五月 上夜坐庭中御幄後忽獲一桃左右或  
見桃從空中墮 上喜曰天賜也修迎恩典五日明日  
復有一桃降其夜白兔生二子 上益喜諭禮部謝玄  
告廟未幾壽鹿亦生二子群臣表賀 上以奇祥三錫  
天眷非常各手詔答之

四十四年六月有芝生于 睿宗原廟廟在太廟都宮之  
外舊爲 睿宗廟後以太廟成神主祔太廟而原廟猶  
存至是前殿東柱產金色芝一本 上大悅因命名玉

芝宮群臣表賀既而奉安 睿宗獻皇帝 慈孝錄

后神位于玉芝宮以高士包存蘭兼提點奉事香火

八月山西陽曲縣生員鄧登高獻白兔賜以金幣

四十五年八月 萬壽節時總督倉場兼理西苑戶部侍郎劉體乾以瑞禾獻三穗者四本二穗者九十六本大學士徐階表賀 上喜批答曰朕仰荷天恩昭賜瑞禾祇切感慶賜體乾等銀幣有差

享和獎

